

Tiga Sayap Umno Diberi Penekanan Peranan, Kepentingan Menang PRU-13
Mstar Online
28 November, 2012
Oleh IZRA ABD RAHMAN

KUALA LUMPUR: Timbalan Presiden Umno, Tan Sri Muhyiddin Yassin sekali memberi penekanan kepada ketiga-tiga sayap parti tentang kepentingan memenangi pilihan raya akan datang.

Ketua Puteri Umno, Datuk Rosnah Abdul Rashid Shirlin berkata, sebagai sayap yang mewakili generasi muda, kepimpinan melihat tiga sayap parti memainkan peranan penting untuk menarik minat generasi muda terhadap parti seterusnya memberi sokongan kepada pimpinan parti.

"Peranan tiga sayap parti amat penting bukan hanya untuk menang pilihan raya tetapi untuk memastikan gagasan transformasi dapat diteruskan.

"Pengkhususan kepada ketiga-tiga sayap, kepimpinan ingin melihat perpaduan sebelum kita menghadapi ujian besar iaitu pilihan raya," katanya kepada pemberita selepas hadir ke Majlis Perasmian Serentak Persidangan Wanita, Pemuda dan Puteri Umno yang dirasmikan oleh timbalan presiden, di Pusat Dagangan Dunia Putra (PWTC) dekat sini, malam Selasa.

Menurut Rosnah, berdasarkan ucapan perasmian timbalan presiden, beliau dilihat lebih memberi penekanan terhadap persediaan dan peranan tiga sayap untuk menghadapi Pilihan Raya Umum Ke-13 (PRU-13).

Katanya, walaupun mempunyai peranan berbeza namun objektif ketiga-tiga sayap adalah sama iaitu untuk menang dalam pilihan raya tidak lama lagi yang disifatkan sebagai ujian besar.

"Beliau menerangkan bahawa adalah menjadi bebanan kepada kita jika benarkan kerajaan ini dikuasai pembangkang," katanya.

Beliau menambah, melihatkan situasi yang berlaku dalam parti pembangkang baru-baru ini, ia jelas menunjukkan pembangkang adalah satu ikatan yang tidak boleh diberikan mandat untuk memerintah.

"Sebab itulah beliau (timbalan presiden) menekankan betapa pentingnya untuk kita menang pilihan raya ini supaya dapat memberi isyarat kepada rakyat bahawa Umno merupakan satu wadah yang memperjuangkan agama, bangsa dan negara," katanya.

Dalam pada itu Rosnah turut menerangkan tentang peranan Pergerakan Puteri Umno dalam memastikan suara wanita muda terus didengari.

Katanya, sayap itu tidak akan menggunakan pendekatan dan pengisian yang digunakan pembangkang untuk anggotanya seperti mengadakan demonstrasi jalanan untuk menarik sokongan.

http://mstar.com.my/berita/cerita.asp?file=/2012/11/28/mstar_berita/2012112800004&ec=mstar_berita